

Impulso pa proteccion di reservanan di naturalesa Caribense DCNA ta ricibi mas di 1.7 miyon euro adicional for di Postcode Loterij

Dutch Caribbean Nature Alliance (DCNA) a ricibi un contribucion financiero adicional for di Nationale Postcode Loterij. Nan ta ricibi e contribucion aki ademas di e contribucion multianual di 500.000 euro pa aña. E contribucion adicional ta di gran importancia pa e trabou di DCNA y lo ser usa pa proteccion y restauracion di reservanan di naturalesa den e parti Caribense di Reino Hulandes.

Jonne Arnoldussen, director gerente di Postcode Loterij, a entrega un chek na director di DCNA Arno Verhoeven na Boneiro. Esaki a tuma luga durante e ultimo reunion di directiva di aña di DCNA, caminda e organisacionnan di conservacion di naturalesa di e seis islanan tabata presente.

E reservanan di naturalesa den e parti Caribense di Reino Hulandes, manera e rifnan di coral den lama y e palonan di mangel na costa, a deteriora cada bes mas lihe den calidad y cantidad den e ultimo decadan. E efectonan di cambio di clima, contaminacion, sobrepesca y especie invasivo ta e causanan principal di e decadencia aki. E consecucionnan di esaki ta tanto ecológicamente como socialmente inde-sea.

E reservanan natural aki ta di gran importancia pa biodiversidad y ta hunga un rol crucial den proteccion di e islanan contra e consecucionnan di cambio di climata. E palonan di mangel por ehempel ta yuda contra ola di tormenta tropical cu ta birando mas frecuente. Ademas, e reservanan natural ta un fuente importante di entrada pa poblacion di e islanan, ya cu e rifnan di coral ta forma un atraccion turistico.

Cu e contribucion adicional di 1.7 miyon euro di Postcode Loterij DCNA por dirigi su mes riba proyectonan cu ta enfoca riba varios isla pa asina realisa e maximo impacto. Ehempelnan di esaki ta proyectonan cu ta dirigi riba restauracion di palo di mangrove y vegetacion di tera. E programa regional aki ta ser desaroya y ehecuto den colaboracion cu e partnernan di aliansa local di DCNA riba e seis islanan di Caribe Hulandes: Aruba Conservation Foundation, CARMABI, STINAPA, Saba Conservation Foundation (STENAPA) y Nature Foundation Sint Maarten. Wereld Natuur Fonds-Nederland (WWF-NL) ta sostene e programa aki cu cono-cemento y fondo.

Arno Verhoeven, director di DCNA, ta bisa: "E contribucion adicional aki ta di tremendo balor pa DCNA y pa e reservanan di naturalesa cu tin asina tanto necesidad di nos yudansa. Danki na e sosten di Postcode Loterij y su participantenan nos por ofrece un futuro sigur y sostenibel na naturalesa den e parti Caribense di Reino Hulandes. Nos kier gradici tur participante na Postcode Loterij pa nan participacion."

Recientemente DCNA a tuma paso grandi como organizacion riba tereno di bon gobernacion y ta encurasha e seis organisacionnan afila pa sigui su ehempel. Hellen van der Wal, Presidente di Hunta di Supervicion di DCNA, ta contento cu e esfuerso-nan di gobernacion a contribui na e confiansa cu Postcode Loterij ta pone den e aliansa, loke a haci e contribucion adicional importante aki posibel.

"Postcode Loterij por confia cu e contribucion ta wordo gasta na bon manera!

Jonne Arnoldussen, director gerente di Postcode Loterij: "Postcode Loterij ta orguyoso di por sostene DCNA den su mision pa proteha naturalesa den e parti Caribense di Reino. Esaki ta permiti e organizacion pa tuma pasonan hopi importante den proteccion di e naturalesa unico den Caribe. Esaki ta sumamente importante tambe, pasobra hopi posibilidad di financiamiento cu ta disponibel pa e parti Europeo di Hulanda no ta disponibel aki,

mientras cu ta bale la pena pa proteha naturalesa bon.

Dutch Caribbean Nature Alliance (DCNA) ta un di red sin fin di lucro cu ta compromete su mes pa proteccion di naturalesa door di sostene maneho di e areanan protegi y e organisacionnan di conservacion di naturalesa den Caribe Hulandes. Funda na aña 2005 DCNA ta representa un esfuerso conhunto entre e islanan pa hunto logra mas. E red local ta kere den poder di union y importancia di conserva nos bunita naturalesa.

Prome paso pa restauracion di edificio di John G. Eman

Dia 4 di december, Stichting Monumentenfonds Aruba (SMFA) a yega na un logro importante den e redestinacion di un edificio historico den curason di Oranjestad.

Hunto cu Minister demisionario di Economia, Geoffrey Wever (Futuro), representantenan di Aruba Bank, Nationaal Restauratiefonds di Hulanda (NRF) y SMFA a firma un acuerdo di intencion pa cu compra y restauracion di ex edificio di John G. Emanbank na Caya G.F. Betico Croes 41.

Durante e ceremonia di firmamento Minister di Economia Geoffrey Wever, Sra. Anne Witsenburg di SMFA, Sra. Marleen van der Borgt di Aruba Bank y meneer Coen Reinders di NRF a hiba palabra.

E bunita edificio, cu ta data di añanan trinta, y a fungi pa hopi aña como oficina di Aruba Bank. Funda pa John G. Eman como e John G. Emanbank na 1925, el a bira Aruba Bank na juli 1936. E edificio historico aki tin mas cu dies aña for di uso, pero pronto lo wordo rebiba danki na e colaboracion entre e diferente partidonan.

Colaboracion

E acuerdo di intencion ta un colaboracion entre SMFA, Ministerio di Economia, Aruba Bank y Nationaal Restauratiefonds (NRF) di Hulanda. E ta encera compra y financiamiento di e restauracion y renobacion di e edificio. Banda di esaki a haci oficial e acuerdo di intencion cu Ministerio di Economia pa huur di e propiedad na varios departamento cu ta resorta bou di e Ministerio.

E plannan nobo lo inclui oficina pa Centraal Bureau Statistiek Aruba (CBS) y Sociaal Economische Raad (SER).



Ademas, lo inclui un espacio comercial na e piso abou pa un facilidad di horeca y un apartamento luhoso na e prome piso.

Balor historico y siguiente pasonan

E edificio tin un arkitektura unico y clasico y ta un potencial monumento cual lo por haya su proteccion di Monumentenbureau unabes e edificio bira propiedad di SMFA. Cu e acuerdo di awe ta pone e prome paso no solamente pa restaura, pero tambe pa conserva su balor historico y na mes momento dun'e un funcion nobo cu ta contribui na revitalisacion di Oranjestad.

E acuerdo di intencion ta duna NRF y SMFA 6 luna pa finalisa e buskeda di fondo pa e parti restauracion.

Despues SMFA lo continua cu e proceso necesario pa asina por cumpli cu e acuerdo pa compra y traspaso oficial di e edificio na e fundacion. E siguiente paso lo ta pa continua cu e plannan pa restauracion y asina inicia cu e proyecto oficialmente na final di 2025.

SMFA ta gradici na e diferente partnernan pa e colaboracion y spera cu pronto nos ta bek dilanti di e edificio di John G. Emanbank pa por anuncia e traspaso oficial di e edificio pa nos fundacion por preserva esaki pa futuro generacionnan.

Lider di partido CURPA, Sr. Eric Ras, a anuncia su retiro for di politica

Despues di eleccion di diabierna ultimo, na unda partido CURPA a saca un total di 423 voto, lider di e partido Sr. Eric Ras, a anuncia cu el a tuma e decision pa retira como lider di e partido y for di politica.

Despues di un trayectoria basta largo den politica, durante cual su enfoca tabata pa defende e norma y balornan Cristian, Sr. Eric Ras a indica a traves di un nota na prensa cu e ta retira oficialmente.

"Nos di partido CURPA kier a gradici tur cu a kere den partido CURPA y a deposita nan confiansa den partido CURPA. Masha danki di Curason. E resultado ta papia pa su mes. Mi persona a tuma e decision di retira como lider di partido CURPA y for di politica. Danki pa e confiansa," Ras a expresa den su nota.

